

Inatsisartut Suleriaasianni § 33 naapertorlugu aalajangiiffigisassatut siunnersuut matumuuna saqqummiuppara:

**Meeqqat atuarianni atuartut akulliit ilinniarnissamut periarfissat assigiinngitsut qanoq atorneqarnissaannut atuartut ilisimasaasa annertusarnissaat siunertaralugu immikkut ittumik siunnersuinissat aallartinneqarnissaat aallartinniarlugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suliniutissaq ukioq 2017-imi aallartinneqassaaq, paasisassarsiorlunilu angalanissanut, suliffeqarfinnut alakkarerinnissanut suliffeqarfeqarfillu pillugu ilinniartitsineritut immikkut aaqqissukkanut aningaasanik kommuninit qinnuteqarfigineqarsinnaasunik pilersitsinissaq aaqqissorneqassalluni.**

(Inatsisartunut ilaasortaq Naaja H. Nathanielsen, Attaviitsoq)

### **Tunngavilersuut**

Ullutsinni piviusut imaapput inuusuttortavut amerlavallaat meeqqat atuariat qimakkaangamikku ilinniagaqarnermik aallartitsineq imaluunniit suliffittaarneq ajortut. Meeqqat atuariata qimannerata kingorna karakteriminnik pitsangorsaaniarlutik imaluunniit ilinni-agaqarnissaminnut suliffeqalernissaminnullu piareersarneq siunertaralugu inuusuttut amerlavallaat Piareersarfinni piffissaq atortariaqartarpaat. Tamanna nunatsinni iluatsinngitsoornerujussuartut oqaatigineqarsinnaavoq, tamanullumi - inunntut ataasiakkaanut inuiaqatigiinnullu imaannaangitsunik kinguneqartarluni. Tamanna Piareersarfiit suliniutigisaannik ammut isiginninnertut paasineqassanngilaq, inuusuttulli taama amerlatigisut Piareersarfinnik pisariaqartitsinerinik pakatsinerinnaalluni.

Isumaga naapertorlugu atuartut meeqqat atuariat akimorlugu angusaqarusussinnaanerit takorluugaqarsinnaanerallu qulakkeerniarlugu annertunerujussuarmik iliuuseqartoqartariaqarpoq. Taamaattoqassappalli ilinniagaqarfigisinnaasat qanorlu atorneqarsinnaaneri pillugit inuusuttut piviusunik paasisaqarsinnaanissaat pisariaqarpoq. Tamannarpiarlu tassaavoq atuartut akulliit fag-imi 'inuttut ineriartorneq'-mik taaguuteqartumi pisortatigoortumik ilikkagassatut pilersaarutit naapertorlugit siunertarinqartoq akullerni atuartuni atorneqartoq.

Angajoqqaarisat suliffeqanngippata imaluunniit ilinniagaqarsimanngippata suliffeqarluni inuuneq imaluunniit ilinniagaqarnermi suliffeqarfinnilu piumasaqaatigineqartut qanoq ittuunerinik takorluuisinnaaneq ajornarsinnaavoq. Taamaammallu periarfissat suusinnaaneri ullumikkornit siusinnerujussuarmik meerartatsinnut takutittariaqarpavut. Ilinniagaqarnissamut imminnut naleqquttunik takorluuilersinniarlugit toqqaanissaminnut periarfissat suunerinik ilisimasaqalernissaannik meeqqat ikiortariaqarpavut. Taamaaliunngikkutta meeqqat inuunerini siusissorujussuarmik suliffeqarfeqarfinnut isersinnaanerminnut periarfissaasigut assigiinngisitsisussaasaagut.

Siunnersuineq maannamut ingerlanneqareerpoq, tamannalu ukiut kingulliit ingerlanerini annertusarneqarsimalluni. Tamanna nuannaarutissaavoq. Siusinnerusukkulli aallartinnissaq pisariaqarpoq. Atuartut angajulliit akornanni piumassuseerussimasinnaaneq atuarnermillu qatsussisimasinnaanissaq naammattooriaannaavoq. Taamaammallu atuartut akulliit aallartiffigalugit immikkut ittumik siunnersuisarnermik suliniutit aallartisarneqarnissaat matumani siunnersuutigaara.

Taamatut immikkut ittumik siunnersuisarnissap siunertarissavaa atuartut siunissami sumik suliaqarnissaminnik aalajangerniarnissaannut ukiut arlaqartut sioqqutsilluni periarfissarpasuit suusinnaanerinik takutitsinissaq. Illinniagaqarfissani, sulinermut sungiusarfigisinnaasani nunatsinnilu suliffeqarfiit arlaanni suliffeqarneq ulluinnarni qanoq innersoq tipisiorfigisinnaassallugu.

Suliffeqarfinnut alakkarterisarnikkut, ilinniagaqarfinnut pulaartarnikkut kiisalu atuartitsissutigineqartuni pingaanerni inuussutissarsiornernut eqqaanartunik ilinniartitaasinnaanikkut atuartut 'ulluinnarni inuunerup' nalaani ilinniakkatik sumut atorneqarnissaat paasisaqarfiginerusinnaassagaat matumani takorloorpara.

Nunatsinni illoqarfinni nunaqarfinnilu assigiinngitsuni suliffeqarfiit ilinniarfiillu sorliit ullumikkut ingerlanneqartut assigiinngitsorujussuarmik agguataarneqartuupput. Taamaammat sineriak tamakkerlugu periarfissat suunerinik iluamik paasisaqassagunik atuartut illoqarfinnut nunaqarfinnullu allanut angalatitaasinnaanerat pisariaqarpoq.

Meeqqat tamakkuninnga paasisassanillu allanik inersimasutulli tusagassiutit atorlugit ilisimasaqalersinnaanerata naatsorsuutigisinnaangilarput. Namminneerlutik qanimut takusariaqarpaat. Tamannalu aallaavigalugu matumani siunnersuutigisara aningaasanik immikkoortitsinikkut ilusilerpara. Taakku kommunit akornanni ima atorneqarsinnaasunngorlugit sumiiffinni pissutsit najoqqutaralugit ilusilersukkamik atuartunut akullernut paasisassarsiorluni angalanissanut, suliffeqarfinnut alakkarterisarnissanut immikkullu aqqissukkanik ilinniartitsinikkut atorneqarsinnaasunngorlugit.

### **Pisortanut aningaasatigut allaffissornikkullu kingunerisassat**

Aningaasat immikkoortitat pissarsiaqarfigissagaanni suut piumasaqataassanersut oqaasertalersornissaat siullermik nukissanik pisariaqartitsissaaq. Taamatut suliassat ukiup affaanik sulinermik, allatut oqaatigalugu 250.000 kr.-it qaangerlugit akeqarnissaa naatsorsuutigineqanngilaq. Suliassarlu tamanna aningaasaliissutaarersut iluini isumagineqarsinnaavoq. Aningaasat immikkoortitassat aallaqqaataaniit annertunnginnissat siunnersuutigineqarpoq, aqqissuussinerlu iluatsilluassappat kingusinnerusukkut annertusineqarsinnaallutik. Taamaalillunilu ukioq 2017-imit Aningaasanut Inatsisissami 800.000 kr.-it immikkoortinneqarsinnaapput.

Tassuunatigit assigiinngitsutigit paasisassarsiorluni angalanissat, ilinniartitsinissat imaluunniit suliffeqarfinnut atatillugu ingerlanniakkat kommuninit misileraaffigineqarsinnaassapput. Tamakku pereerpata ukiumut 2018-imit ukiunullu tulliuuttunut missingersuusiorfinnut pisariaqartitassat kommunit peqatigalugit oqaloqatigiissutigineqarsinnaapput. Eqqaamasariaqarporli Nunatta Avannaani Tunumilu atuartut angalanissaat akisunerusussaassammata taamaammallu tamaani atuartut immikkut isiginiartariaqassallutik.

### **Namminersorluni inuussutissarsiuteqarnermut aningaasatigut allaffissornikkullu kingunerisassat**

Siunissaq qaninneq isigalugu kinguneqartussaangilaq. Siunissaq ungasinnerusooq isigigaanni innuttaasut sulerusussuseqartut amerlinissaat neriututigineqarsinnaavoq.

### **Innuttaasunut aningaasatigut allaffissornikkullu kingunerisassat**

Periarfissanik ujartuinissami inuunermi siusinnerusukkut ilinniagaqarfissanut suliffeqarfeqarfinnullu qaninnerulernissap pitsaanerusumik piviusorpalaartumillu periarfissineqarnera.